

博物志

冊全



博物志

四時雜記

刻連江葉氏本博物志序

予家有汲古閣影鈔宋本博物志末題云連江葉氏與今世所行本夙然不同嘗取而讀之乃知茂先此書大略撮取載籍所爲故自來目錄皆入之雜家其體例之獨創者則隨所撮取之書分別部居不相雜廁如卷首括地象畢方繼以考靈耀是也以下雖不能條舉所出然列子山海經逸周書等皆顯然可驗今本強立門類割裂遷就遂使蕩析離居失其情趣致爲巨謬矣考晁氏讀書志及文獻通考皆載周日用注十卷卽是此本晁云首卷地理略後有讚文實爲吻合遂刻之以正今本之失於中仍不免訛錯如時含神霧三時是詩之誤毋丘儉遣王領三領是頎之誤右詹山帝女化

為詹艸六右詹山是古魯山之誤山海經作姑媯詹艸是

魯艸之誤山海經作葛取伏卵段七段是暇之誤東阿

王韓詩外傳無王字勇士有蕃丘訖八東阿是東海之誤

蕃是菑之誤射窮石以為伏虎八窮是寢之誤今

見狗襲八襲是壘之誤初學記作壘師雨妻黑色八師

雨妻是雨師妾之誤樹之于闕聞十聞是間之誤

此周書程寤逸文也又如莖必沐浴昔夏后莖乘飛龍昔夏

啓莖徙九鼎昔舜莖登天為神桀莖伐唐昔鯀莖

注洪水六莖皆筮之誤盡似仙人兩形盡似猿猴

八盡皆畫之誤西夏云有巢以民十云民二字皆

亡之誤又如始皇陵一條四略不可讀及以宋敏

求長安志五在十卷引關中記訂之乃得通其闕佚處

附錄關中記曰秦始皇陵在驪山之北高數十丈周六里今在陰盤縣界此陵雖高大不足以消六

十萬人積年之功其用力或隱不見不見者驪  
山水泉本北流者陂障使東西流又此山無石於  
渭北諸山運取大石故其歌曰運石甘泉口渭水  
爲不流千人一唱萬人相鉤今陵下餘石大如藍  
士屋其銷功也此等皆不難校正今悉仍其舊者恐  
失真也略標數端以待善讀者引伸焉若夫通考  
所云博物四百本非有成書而劉昭郡國志注小  
司馬索隱李崇賢文選注及藝文類聚初學記太  
平御覽所引多出今本外隋志云博物志十卷張  
華撰又云張公雜記一卷張華撰梁有五卷與博  
物志相似小小不同又云雜記十卷一卷張華撰然  
則所引或出二書歟倘好事者搜輯纂錄不妨別  
存梗概苟欲執彼以補此則恐取無事自擾之誚  
有所未可也嘉慶八年正月吳縣黃丕烈書



博物志序

晉司空張華撰

地理略自魏氏日已前夏禹治四方而制之  
余視山海經及禹貢爾雅說文地雖曰悉備各有  
所不載者作略說出所不見粗言遠方陳山川位  
象吉凶有徵諸國境界犬牙相入春秋之後並相  
侵伐其土地不可具詳其山川地澤略而言之正  
國十二博物之士覽不卸焉



國子監文士學不尚識

其山以世為名而文士

其人者如文之為世所

不始者其出也下其跡言

及每貢爾其文賦雖曰

世自發凡日已前夏得

晉司空華

晉書

博物志卷第一

晉司空張華撰

汝南周日用等注

河圖括地象曰地南北三億三萬五千五百里地  
祁之位起形高大者有崑崙山廣萬里高萬一千  
里神物之所生聖人仙人之所集也出五色雲氣  
五色流水其泉南流入中國名曰河也其山中應  
于天最居中八十城布繞之中國東南隅居其一  
分是好城也崑崙山北地轉下三千六百里有八  
玄幽都方二十萬里地下有四柱四柱廣十萬里  
地有三千六百軸犬牙相牽名山大川孔穴相內  
和氣所出則生石脂玉膏食之不死神龍靈龜行  
於穴中矣東方有螭螭沃焦防風氏長三丈短人

處九寸遠夷之名雕題黑齒穿擔耳天竺岐首地  
以名山爲輔佐石爲之骨川爲之脈草木爲之毛  
土爲之肉三尺以上爲糞三尺以下爲地

考靈耀曰地有四遊冬至地上北而西三萬里夏  
至地下南而東三萬里春秋二分其中矣地恆動  
不止譬如人在舟而坐舟行而人不覺

七戎六蠻九夷八狄形總而言之謂之四海言皆  
近海海之言晦昏無所覩也

漢北廣遠中國人尠有至北海者漢使驃騎將軍  
霍去病北伐單于至瀚海而還有北海明矣

余聞北海言蘇武牧羊之所去年德甚邇祇一池  
號北海蘇武牧羊常在於是耳此地見有蘇武廟  
非北海溟漢使張騫渡西海至大秦西海之濱有小

崑崙高萬仞方八百里東海廣漫未聞有渡者

史記封禪書云齋冥燕昭遣人乘舟入海有蓬萊  
方丈瀛洲三神山神人所集欲採仙藥蓋言先有  
至之者其鳥獸皆白金銀爲宮闕悉在渤海中去  
人不遠也南海短狄未及西南夷以窮斷今渡南  
海至交趾者不絕也

中國之城左濱海右通流沙方而言之萬五千里  
東至蓬萊西至隴右后跨京北前及衡岳堯舜土  
萬里時七千里亦無常隨德優劣也

東方少陽日月所出山谷清其人佼好

西方少陰日月所入其土窳冥其人高鼻深目多  
毛

南方太陽土下水淺其人大口多傲  
北方太陰土平廣深其人廣面縮頸

中央四折風雨交山谷峻其人端正

堯別九州舜爲十二

五岳華岱恆衡嵩

四瀆河出崑崙墟江出岷山濟出王屋淮出桐柏  
八流亦出名山渭出鳥鼠漢出蟠冢洛出熊耳涇  
出少室汝出燕泉泗出陪尾沔出月台沃出太山  
水有五色有濁有清汝南有黃水華山有黑水汜  
水淵或生明珠而岸不枯山澤通氣以與雷雲氣  
觸石膚寸而合不崇朝以雨

小山有其形如鼓一足如蠡澤有委邪狀如轂長  
蛇音也見之者霸

昔夏禹觀河見長人魚身出曰吾河精豈河伯也  
馮夷華陰潼鄉人也得仙道化爲河伯豈道同哉

仙夷乘龍虎水神乘魚龍其行恍惚萬里如室  
水石之怪爲龍罔象木之怪爲躩魍魎土之怪爲  
墳羊火之怪爲宋無忌  
地性含水土泉者引地氣也山有沙者生金有  
穀者生玉名山生神芝不死之草上芝爲車馬中  
芝爲人形下芝爲六畜土山多雲鐵山多石五土  
所宜黃白宜種禾黑墳宜麥黍蒼赤宜菽芋下泉  
宜稻得其宜則利百倍

有山者採有水者漁山氣多男澤氣多女平衍氣  
仁高凌氣犯叢林氣蹇故擇其所居居在高中之  
平下中之高則產好人

居無近絕溪羣冢狐蟲之所近此則死氣陰匿之  
處也

石者金之根甲石精流以生水水生木木含火援神契曰五岳之神聖四瀆之精仁河者水之伯上應天漢太山天帝孫也主召人魂東方萬物始故知人生命之長短

老子云萬民皆付西王母唯王聖人真人仙人道人之命上屬九天君耳

五岳視三公四瀆視諸侯諸侯賞封內名山者通靈助化位相亞也故地動臣叛名山崩王道訖川竭神去國隨也亡海投九仞之魚流水涸國之大誠也澤浮舟川水溢臣盛君衰百川沸騰山冢卒崩高岸爲谷深谷爲陵小人握命君子陵遲白黑不別大亂之徵也

江河水赤名曰泣血道路涉骸於河以處也

和氣相感則生朱草山出象車澤出神馬陵出黑  
丹阜出土怪江南大貝海出明珠仁主壽昌民延  
壽命天下太平

秦前有藍田之鎮後有胡苑之塞左崦函右隴蜀  
西通流沙險阻之國也

蜀漢之士與秦同域南跨邛笮北阻褒斜西卽隈  
礙隔以劍閣窮險極峻獨守之國也

周在中樞西阻崦谷東望荆山南面少室北有太  
嶽三河之分雷風所起四險之國也

魏前枕黃河背漳水瞻王屋望梁山有藍田之寶  
浮池之淵

趙東臨九州西瞻恆嶽有沃瀑之流飛壺井陘之  
險至于潁陽涿鹿之野



燕却背沙漠進臨易水西至君都東至於遼長蛇帶塞險陸相東也

齊南有長城巨防陽關之險北有河濟足以爲固越海而東通于九夷西界岱嶽配林之峻坂險之國也

魯前有淮水後有岱嶽蒙羽之向洙泗之流大野廣土曲阜尼丘

宋北有泗水南迄睢過有孟諸之澤碭山之塞也楚後背方城前及衡嶽左則彭蠡右則九疑有江漢之流實險阻之國也

南越之國與楚爲鄰五嶺已前至于南海負海之邦交趾之士謂之南裔

吳左洞庭右彭蠡後濱長江南至豫章水戒險阻

之國也

東越海通海處南北尾闈之間三江流入南海通東治嵩海深險絕之國也

衛南跨于河北得洪水南過漢上左通黎澤右指黎山

讚曰

地理廣大

四海八方

遐遠別域

略以難詳

侯王設險

守固保強

遠遮川塞

近備城堙

司察姦非

禁禦不良

勿恃危阨

恣其淫荒

無德則敗

有德則昌

安屋猶懼

乃可不亡

進用忠險

社稷永康

教民以孝

舜化以彰

博物志卷第一

博物志卷第二

凡月暈隨灰畫之隨所畫而闕

淮南子云未詳其法

麒麟鬪而日蝕

鯨魚死而彗星出

嬰兒號婦乳出

龍肉以醢漬之則文章生

人食鸞肉不可入水爲蛟龍所吞

人食終葵爲狗所齧瘡不差或致死

鼠食巴豆三年重三十斤

婦人妊身不欲令見醜惡物異類鳥獸食當避其

異常味不欲令見熊羆虎豹御及鳥射射雉食牛

心白犬肉鯉魚頭席不正不坐割不正不食聽誦

詩書諷詠之音不聽淫聲不視邪色以此產子必

賢明端正壽考所謂父母胎教之法

盧氏曰子去

則生仁聖謂錯亂之氣則生貪淫子由之氣也

故古者婦人妊娠必慎所感感於善則善感於惡則惡矣妊娠者不可啖兔肉又不可見兔令兒唇缺又不可啖生薑令兒多指

異說云瞽叟夫婦凶頑而生舜叔梁紇淫夫也徵在失行也加又野合而生仲尼焉其在有胎教也

盧氏曰夫甲及寅申生者聖以年在歲德在甲寅壬申生者則然矣亦由先生也亦由父母氣也古者元氣清故多聖人今者俗淫陰濁故無聖人也

五月五日埋蜻蜓頭於西向戶下埋至三日不食

則化成青真珠又云埋於正中門

莊子曰地三年種蜀黍其後七年多蛇

鬪戰死亡之處其人馬血積年化為鱗鱗著地及

草木如露略不可見行人或有觸者著人體便有  
光拂拭便分散無數愈甚有細咤聲如炒豆唯靜  
住良久乃滅後其人忽忽如失魂經日乃差  
今人梳頭脫著衣時有隨梳解結有光者亦有咤  
聲

白鷓雄雌相視則孕或曰雄鳴上風則雌孕  
兔舐毫望月而孕口中吐子舊有此說余目所見  
也

馬食穀則足重不能行  
鴈食粟則翼重不能飛

山居之民多癭腫疾由於飲泉之不流者今荆南  
諸山郡東多此疾瘡由踐土之無鹵者今江外諸  
山縣偏多此病也

盧氏曰不然也此病蓋南出黑  
北人及吳楚無此病

水水土然也如是不  
流泉井尤無此病也

人啖豆三年則身重行止難

啖榆則眠不欲覺

啖麥稼令人力健行

飲真茶令人少眠

人常食小豆令人肥肌麤燥

食鷲麥令人骨節斷解

山雞有美毛自愛其色終日映水目眩則溺死

鸚雉長毛雨雪惜其尾栖高樹杪不敢下食往往

餓死時魏景初中天下所說

鸛水鳥也伏卵時卵冷則不沸取礬石用繞卵以

時助燥氣故方術家以鸛巢中礬石

燒馬蹄羊角成灰春夏散著溼地生羅勒大腰無

雄龜鼉類也無雄與蛇通氣則孕細腰無雌蜂類也

取桑蠶或阜螽子咒而成子詩云螟蛉之子蜾蠃負之是也

煎麻油水氣盡無煙不復沸則還冷可內手攪之得水則豔起散卒不滅此只試之有驗

燒白石作白灰既訖積著地經日都冷遇雨及水澆卽更燃煙豔起

蟻螬以背行快於足用

江南山谿中水射工蟲甲類也長一二寸口中有弩形氣射人影隨所著處發瘡不治則殺人今鸚

蝮蟲溺人影亦隨所著處生瘡盧氏曰以雞腸草

日用曰萬物皆有所相感愚聞以霹靂木擊鳥影其鳥應時落地雖未嘗試以是類之必有之



百足一名馬蚊中斷成兩段各行而去蜥蜴或名  
蝮蜓以器養之以朱砂體盡赤所食滿七斤治擣  
萬杵點女人支體終本不滅有房室事則滅故號  
守宮傳云東方朔語漢武帝試之有驗

削汞令圓舉以向日以艾於後成其影則得火  
取火法如用珠取火多有說者此未試

陳葵子微火炒令爆咤散者熟地遍蹋之朝種暮  
生遠不過經宿耳

陳葵子秋種覆養令經冬不死春有子也周日用

熟地植生菜蘭擣石流黃篩於其上以盆覆之即  
時可待又以變白牡丹為五色皆以五色汁日沃  
其根以紫草汁則變令紫紅花汁則  
變紅並未試於理可焉此出爾雅

鳥雌雄不可別翼右掩左雄左掩右雌二足而翼  
謂之禽四足而毛謂之獸

人藉帶眠者則夢蛇

鳥啣人之髮夢飛

鵲巢門戶背太歲得非才智也

蠶三化先孕而後交不可者亦產子子後為蠶皆

無眉目易傷收採亦薄

蟹漆相合成為神仙藥服食方云

九竅者胎化八竅者卵生龜鼈皆此類咸卵生影

伏

婦人妊娠未滿三月著葷衣冠平日左遶井三匝

映詳影而去勿反顧勿令人知見必生男周日用

則可依法或先是男如何余聞有定法定母年日

月與受胎時日算之遇奇則為男遇偶則為女知

為女復身  
可依法  
荊州極西南界至蜀諸民曰獠子婦人妊娠七月

而產臨水生兒便置水中浮則收養之沈便棄之  
然千百多浮既長皆拔去上齒牙各一以為身飾  
神仙傳曰說上據辰尾為宿歲星降為東方朔傳  
說死後有此宿東方生無歲星

漢淮南王謀反被誅亦云得道輕舉周書云淮南自漢

刑應不然乎得道輕舉非虛事也至今維楊境內

馬迹猶存且日與入公同處皆上品真人耳既談

道德肯圖叛逆之事况恆行陰德好書鼓不善弋

獵淮南內書言神仙黃白之術去反事遠矣夫古

今書傳多黜仙道者慮帝王公侯廢萬幾而慕其

道故隱而不書唯老聃不可掩而云二百歲後西

遊流沙不知所之○庚書云蜀有女道士謝

自然白日上昇此外歷代史籍未嘗言也

鉤弋夫人被殺於雲陽而言尸解柩空周史云夫入  
被大風拔樹揚沙揭  
石亦不云尸解柩空  
桓譚新論說方士有董仲君罪繫獄佯死臭自陷  
出既而復生

魏時方士甘陵甘始

廬江有左慈陽城有郟儉始能行氣導引慈曉房中之術善辟穀不食悉號二百歲人凡如此之徒武帝皆集之於魏不使遊散甘始孝而少容曹子建密問其所行始言本師姓韓字世雅嘗與師於南海作金投數萬斤於海又取鯉魚一雙鯉遊行沈浮有若處淵其無藥者已熟而食言此藥去此踰遠萬里已不可行不能得也

齊桓公出因與管仲故道烏燉煌西沒流沙往外國沙沙千餘里中無水時時有汜流處人莫能知皆乘駱駝駱駝知水脈過其處輒停不肯行以足蹋地人於其蹋處掘之輒得水

諸遠方山郡幽辟處出蜜蠟人往往以桶聚蜂每

年一取

人有山行墮深澗者無出路飢餓分死左右見龜蛇甚多朝暮引頸向東方人因伏地學之遂不飢體殊輕便能登巖岸經數年後竦身舉臂遂超出澗上卽得還家顏色悅懌頗更黠惠勝故還食穀淡滋味百餘日中復本質

天門郡有幽山峻谷谷在上人有從下經過者忽然踊出林表狀如飛仙遂絕迹年中如此甚數遂名此處爲仙谷有樂道好事者入此谷中洗沐以求飛仙往往得去有長意思人疑必妖怪乃以大石自墜牽一犬入谷中犬復飛去其人還告鄉里募數十人執杖攜山草伐木至山頂觀之遙見一物長數十丈高隱人耳如簸箕格射刺殺之所吞

人骨積此左右有成封蟒開口廣尺餘前後失人皆此蟒氣所噏上於是此地遂安隱無患

漢末關中大亂有發前漢時冢者人猶活既出平復如舊魏郭后愛念之錄著宮內常置左右問漢時宮中事說之了了皆有次序后崩哭泣過禮遂死焉

漢末發范友朋冢奴猶活友朋霍光女聳說光家事廢立之際多與漢書相應此奴常遊走於民間無止住處今不知所在或云尙在余聞之於人可信而目不可見也

景初中蒼桐吏到京云廣州西南接交州數郡桂林晉興寧浦間人有病將死便有飛蟲大如小麥或云有甲在舍上人氣絕來食亡者雖復撲殺有

一珍倣宋版印

斗斛而來者如風雨前後相尋續不可斷截肌肉  
都盡唯餘骨在便去盡貧家無相纏者或殞殮不  
時皆受此弊有物力者則以衣服布帛五六重裹  
亡者此蟲惡梓木氣卽以板鄣防左右并以作器  
此蟲便不敢近也入交界更無轉近郡亦有但微  
少耳

博物志卷第二

博物志卷第三

河圖玉板云龍伯國人長三十丈生萬八千歲而死大秦國人長十丈中秦國人長一丈臨洮人長三丈五尺禹致宰臣於會稽防風氏後至戮而殺之其骨專車長狄喬如身橫九畝長五丈四尺或長十丈

秦始皇二十六年有大人十二見于臨洮長五丈足迹六尺東海之外大荒之中有大人國僬僥氏長三丈時含神霧

日東北極人長九寸

漢武帝好仙道祭祀名山大澤以求神仙之道時西王母遣使乘白鹿告帝當來乃供帳九華殿以待之七月七日夜漏七刻王母乘紫雲車而至於



殿西南面東向頭上戴七種青氣鬱鬱如雲有三  
青鳥如鳥大使侍母旁時設九微燈帝東面西向  
王母索七桃大如彈丸以五枚與帝母食二枚帝  
食桃輒以核著膝前母曰取此核將何爲帝曰此  
桃甘美欲種之母笑曰此桃三千年一生實唯帝  
與母對坐其從者皆不得進時東方朔竊從殿南  
廂朱鳥牖中窺母母顧之謂帝曰此窺牖小兒嘗  
三來盜吾此桃帝乃大怪之由此世人謂方朔神  
仙也

漢武帝時弱水西國有人乘毛車以渡弱水來獻  
香者帝謂是常香非中國之所乏不禮其使留久  
之帝幸上林苑西使千乘輿聞并奏其香帝取之  
看大如鷲卵三枚與棗相似帝不悅以付外庫後

長安中大疫宮中皆疫病帝不舉樂西使乞見請  
燒所貢香一枚以辟疫氣帝不得已聽之宮中病  
者登日並差長安中百里咸聞香氣芳積九月餘  
日香猶不歇帝乃厚禮發遣餞送一說漢制獻香  
不滿斤西使臨去乃發香氣如大豆者拭著宮門  
香氣聞長安數十里經數日乃歇

漢武帝時西海國有獻膠五兩者帝以付外庫餘  
膠半兩西使佩以自隨後從武帝射於甘泉宮帝  
弓弦斷從者欲更張弦西使乃進乞以所送餘香  
膠續之座中左右莫不怪西使乃以口濡膠爲以  
住斷弦兩頭相連注弦遂相著帝乃使力人各引  
其一頭終不相離西使曰可以射終日不斷帝大  
怪左右稱奇因名曰續弦膠

漢武帝時大苑之北胡人有獻一物大如狗然聲能驚人雞犬聞之皆走名曰猛獸帝見之怪其細小及出苑中欲使虎狼食之虎見此獸卽低頭著地帝爲反觀見虎如此欲謂下頭作勢起搏殺之而此獸見虎甚喜舐唇搖尾徑住虎頭上立因搯虎面虎乃閉目低頭匍匐不敢動搯鼻下去下去之後虎尾下頭去此獸顧之虎輒閉目後魏武帝伐蹋頓經白狼山逢師子使人格之殺傷甚衆王乃自率常從軍數百擊之師子哮吼奮起左右盛驚王忽見一物從林中出如狸起上王車軛師子將至此獸便跳起上師子頭上卽伏不敢起於是遂殺之得師子一還來至洛陽三千里雞犬皆伏無鳴吠

舊說云天河與海通近世有人居海渚者年年八月有浮槎去來不失期人有奇志立飛閣於查上多齎糧乘槎而去十餘日中猶觀星月日辰自後芒芒忽忽亦不覺晝夜去十餘日奄至一處有城郭狀屋舍甚嚴遙望宮中多織婦見一丈夫牽牛渚次飲之牽牛人乃驚問曰何由至此此人見說來意并問此是何處答曰君還至蜀郡訪嚴君平則知之竟不上岸因還如期後至蜀問君平曰某年月日有客星犯牽牛宿計年月正是此人到天河時也

周官云貉不渡汶水鸚不渡濟水魯國無鸚鵡來巢記異也

橘渡江北化爲枳今之江東甚有枳橘

太古書今見存有神農經山海經或云禹所作周易

蔡邕云禮記月令周公作周日用曰禮記疏云第一是呂不韋春秋明呂

氏所制蔡邕云周公未之詳也

謚法司馬法周公所作

南越巢居北朔穴居避寒暑也

東南之人食水產西北之人食陸畜食水產者龜

蛤螺蚌以為珍味不覺其腥臊也食陸畜者狸兔

鼠雀為珍味不覺其膾焦也

毋丘儉遣王領追高句麗王宮盡沃沮東界問其

耆老言國人常乘船捕魚遭風吹數十日東得一

島上有人言語不相曉其俗常以七夕取童女沈

海又言有一國亦在海中純女無男又說得一布

衣從海浮出其身如中國人衣兩袖長二丈又得一破船隨波出在海岸邊有一人項中復有面生得與語不相通不食而死其地皆在沃沮東大海中

大宛國有汗血馬天馬種漢魏西域時有獻者越巂國有牛稍割取肉牛不死經日肉生如故周書曰西域獻火浣布昆吾氏獻切玉刀火浣布汗則燒之卽潔刀切玉如螭布漢世有獻者刀則未聞

東海蛟錯魚生子子驚還入母腸尋復出

積油滿百石則自然生火武帝泰始中武庫災積油所致

常山之蛇名率然有兩頭觸其一頭頭至觸其中

則兩分俱至孫武以喻善用兵者

東海有物狀如凝血從廣數尺方圓名曰鮓魚無頭目處所內無藏衆蝦附之隨其東西人煮食之取鼈挫令如碁子大擣赤莧汁和合厚以茅苞五六日中作投池中經旬日變變盡成鱉也

吳王江行食鱸有餘棄於中流化爲魚今魚中有名吳王鱸餘者長數寸大者如筋猶有鱸形

廣陵陳登食膾作病華佗下之膾頭皆成蟲尾猶是膾

春秋書鼯鼠食郊牛牛死鼠之類最小者食物當時不覺痛世傳云亦食人項肥厚皮處亦不覺或名甘鼠俗人諱此所嚙衰病之徵

博物志卷第三

博物志卷第四

殷三仁微子箕子比干

文王四友南宮括散宜生閔天太顛

仲尼四友顏淵子貢子路子張

春秋哀公十有四年春西狩獲麟公羊傳曰有以

告者孔子曰孰為來哉孰為來哉盧曰以其時非

感之麟口吐三策  
蓋天使報聖人

左傳曰叔孫氏之車子鉏商獲麟以為不祥

司馬遷云無堯以天下讓許由事揚雄亦云誇大

者為之揚雄又云無仙道桓譚亦同周曰用曰神

非揚雄桓譚之所能知且秦穆趙鞅皆見上帝  
亦由仙乎既有鬼神豈无仙界況神烈二傳有驗

者匪一余覽唐史當上皇天寶之際老聃見者十  
數至於御路陷井亦出言之以此詳之豈無是也

禮記曰孔子少孤不知其父墓母亡問於鄒曼父



之母乃合葬於防防墓又崩門人後至孔子問來

何遲門人實對孔子不應如是者三乃濟然流涕

而止曰古不脩墓蔣濟何晏夏侯玄王肅皆云無

此事注記者謬時賢咸從之周日用曰四士言無

在愚所見實未之有矣且徵在與梁紇野合而產

事多隱之況我丘生而父已死既隱何以知之非

問曼父之母安得合葬於防也

肉刑明王之制荀卿每論之興漢文帝感太倉公

女之言而廢之班固著論宜復迄漢末魏初陳紀

又論宜申古制孔融云不可復欲申之鍾繇王朗

不同遂寢夏侯玄李勝曹羲丁謚建私議各有彼

此多云時未可復故遂寢焉

漢興多瑞應至武帝之世特甚麟鳳數見王莽時郡國多稱瑞應歲歲相尋皆由順時之欲承旨求

媚多無實應乃使人猜疑

三讓 一曰讓禮二曰固讓三曰終讓

上公備物九錫 一大輅各一玄牡二駟 二袞

冕之服赤舄副之 三軒懸之樂六佾之舞 四

朱戶以居 五納陛以登 六虎賁之士三百人

七鈇鉞各一 八彤弓一彤矢百旅弓十旅矢

千 九鉅鬯一卣珪瓚副之

舊洛陽字作水邊各火行也忌水故去水而加佳

又魏於行次爲土水得土而流土得水而柔故復

佳加水變雒爲洛焉

堯時有屈佚草生於庭佞人入朝則屈而指之一

名指佞草

何以知還風也假令東風雲反從西來詭詭而疾

此不旋踵立西風矣所以然者諸風皆從上下或薄於雲雲行疾下雖有微風不能勝上上風來到反矣

盜跖冢在大陽縣西

趙鞅冢在臨水縣界

曹參字敬伯

蔡伯喈母袁公妹曜鄉姑也

余友人下邳陳德龍謂余言曰靈光殿賦南郡宜城王子山所作子山嘗之泰山從鮑子真學算過魯國而殿覩賦之還歸本州溺死湘水時年二十餘也

南荆賦江陵有臺甚大而有一柱衆木皆共之徐州人謂塵土爲蓬塊吳人謂跋跌

古駿馬有飛兔腰褭

周穆王八駿赤驥飛黃白蟻華騶騄耳騮踰渠黃

盜驪

唐公有驪驪

項羽有騅

周曰用曰曹公有流影而呂有赤兔皆後來有良駿也

周穆王有犬名耗毛白

晉靈公有害狗名獒

韓國有黑犬名盧

宋有駿犬曰雒

犬四尺為獒

寶劍名純鉤湛廬豪曹

魚腸巨闕五劍皆歐冶

子所作龍泉太阿工市三劍皆楚王者

風胡子因吳請干將歐冶亦作干將陽龍文莫邪

陰漫理此二劍吳王使干將作莫邪干將妻也

夫婦

甚善作劍也

蔡邕有書萬卷漢末年載數車與王粲粲亡後相國掾魏諷謀反粲子與焉既被誅邕所與粲書悉入粲族子葉字長緒卽正宗父正宗卽輔嗣兄也初粲與族兄凱避地荊州依劉表表有女表愛粲才欲以妻之嫌其形陋周率乃謂曰君才過人而體兒非女聳才凱有風貌乃妻凱生葉卽女所生太丘長陳寔寔子鴻臚卿紀紀子司空羣羣子泰四世於漢魏二朝有重名而其德漸小減故時人爲其語曰公慚卿卿慚長

聖人制作曰經賢者著述曰傳鄭玄注毛詩曰箋不解此意或云毛公嘗爲北海郡守玄是此郡人

故以爲敬

何休注公羊傳云何氏學又不能解者或答云休謙詞受學於師乃宣此義不出於己此言爲允

漢丞秦羣臣上書皆曰昧死言王莽盜位慕古法昧死曰稽首光武因而不改

漢末喪亂絕無金石之樂魏武帝至漢中得杜夔舊法始復設軒懸鐘磬至於今用之於夔也

漢末喪亂絕無玉佩始復作之今之玉佩受於王粲也

古者男子皆絲衣有故乃素服又有冠無幘故雖凶事皆著冠也

姜厚嗣祠在墉城長安西南三十里

周自后稷至于文武皆都關中號爲宗周秦爲阿

房殿在長安西南二十里殿東西千步南北三百步上可以坐萬人庭中受十萬人二世爲趙高所殺於宜春宮在杜城南三里葬於旁

始皇陵在驪山之北高數十丈周迴六七里今在陰盤縣界北陵雖高大不足以銷六丈水背陵鄣使東西流又北山石運取大石於清北渚故歌曰運石甘泉口渭水爲不流千人唱萬人鈎金陵餘石大如堰土屋甚銷功力皆如此類

用珍寶多故高山者後難發也高則難上圍則難攻項羽爭衡之時發其陵未詳其至棺否

博物志卷第四

博物志卷第五

天地初不足故女媧氏練五色石以補其闕斷鼇  
足以立四極其後共工氏與顓頊爭帝而怒觸不  
周之山折天柱絕地維故天後傾西北日月星辰  
就焉地不滿東南故百川水注焉

越之東有駭沐之國其長子生則解而食之謂之  
宜弟父死則負其母而棄之言鬼妻不可與同居

周日用曰既其母為鬼妻則其為鬼子亦合棄之  
矣是以如蠻夷於禽獸犬豕一等矣禽獸犬豕之  
徒猶應  
乃然也

楚之南有炎人之國其親戚死朽之肉而棄之然  
後埋其骨乃為孝子也

秦之西有義渠國其親戚死聚柴積而焚之熏之  
即煙上謂之登遐然後為孝此上以為政下以為



俗東國未足爲非也此事見墨子

周日用曰此事庶幾佛國之法

且如是乎中國之徒亦多此也

孔子東遊見二小兒辯鬪問其故一小兒曰我以

日始出時去人近而日中時遠也一小兒曰以日

出而遠而日中時近一小兒曰日初出時大如車

蓋及日中時如盤蓋此不爲遠者小而大者近乎

一小兒曰日初出滄滄涼涼及其中而探湯此不

爲近者熱而遠者涼乎孔子不能決謂兩小兒曰

孰謂汝多知乎亦出列子

周日用曰且當中向熱者炎氣直下也譬猶火

氣直上而與旁著其炎涼可悉耳是明初出近而當中遠矣豈聖人肯對乎

詹何以獨繭絲爲綸芒針爲鈎荆條爲竿剖粒爲

餌引盈車之魚於百仞之淵汨流之中綸不絕鈎

不申竿不撓

薛譚學謳於秦青未窮青之旨於一日遂辭歸秦青不餞於郊衢撫節悲歌聲震林木響遏行雲薛譚乃謝求返終身不敢言歸秦青顧謂其友曰昔韓娥東之齊遺糧過雍門鬻歌假食而去餘響遶梁三日不絕左右以其人弗去過逆旅凡人辱之韓娥因曼聲哀哭一里老幼喜歡抃舞弗能自禁乃厚賂而遣之故雍門人至今善歌哭效娥之遺聲也

趙襄子率徒十萬狩於中山藉芻燔林扇赫百里有人從石壁中出隨煙上下若無所之經涉者襄子以爲物徐察之乃人也問其奚道而處石奚道而入火其人曰奚物爲火其人曰不知也魏文侯聞之問於子夏曰彼何人哉子夏曰以商所聞於

夫子和者同於物物無得而傷閱者遊金石之間  
及蹈於水火皆可也文侯曰吾子奚不爲之子夏  
曰刳心知智商未能也非不能也雖試語之而卽  
暇矣文侯曰夫子奚不爲之子夏曰夫子能而不  
爲之侯不悅

思士不妻而感思女不夫而孕后稷生乎巨跡伊  
尹生乎空桑

燕太子丹質於秦秦王遇之無禮不得意思欲歸  
請於秦王王不聽謬言曰令烏頭白馬生角乃可  
丹仰而歎烏卽頭白俯而嗟馬生角秦王不得已  
而遣之爲機發之橋欲陷丹丹驅馳過之而橋不  
發遁到關關門不開丹爲雞鳴於是衆雞悉鳴遂  
還歸

昔劉玄石於中山酒家酤酒酒家與千日酒忘言其節度歸至家當醉而家人不知以爲死也權葬之酒家計千日滿乃憶玄石前來酤酒醉向醒耳往視之云玄石亡來三年已葬於是開棺醉始醒俗云玄石飲酒一醉千日

西域有蒲萄酒積年不敗彼俗云可十年飲之醉彌月乃解

古之善射者甘蠅蠅之弟子曰飛衛更羸善謂魏王曰臣能射爲虛發而下鳥王曰然可於此乎曰聞有鳥從東來羸虛發而下之也

按北太行山而北去不知山所限極處亦如東海不知窮盡也

成王冠周公使祝雍曰辭達而勿多也祝雍曰近

一珍做宋版印

於民遠於佞近於義嗇於時惠於財任賢使能陞  
下擢顯先帝光耀以奉皇天之嘉祿欽順仲壹之  
言曰遵並大道郊域康阜萬國之休靈始明元服  
推遠童稚之幼志弘積文武之就德肅勤高祖之  
清廟六合之內靡不蒙德歲歲與天無極右孝昭  
用成王冠辭

止雨祝曰天生五穀以養人民今天雨不止用傷  
五穀如何如何靈而不幸殺牲以賽神靈雨則不  
止鳴鼓攻之朱綠繩縈而脅之

請雨曰皇皇上天照臨下土集地之靈神降甘雨  
庶物羣生咸得其所

周時德澤盛蒿大以爲宮柱名曰蒿宮

博物志卷第五

博物志卷第六

黃帝治天下百年而死民畏其神百年以其數百年故曰黃帝治三百年上古男三十而妻女二十而嫁曾子曰弟子不學古知之矣

貧者不勝其憂富者不勝其樂

曾子曰好我者知吾美矣惡我者知吾惡矣

龜三千歲旋于卷耳之上

武王伐殷舍於幾逢大雨焉乘輿三百乘甲三千一日一夜行三百里以戰于牧野

著一千歲而三百莖其本以老故知吉凶著末大於本爲上吉莖必沐浴齋潔食香每日望浴著必五浴之浴龜亦然明夷曰昔夏后莖乘飛龍而登于天而牧占四華陶陶曰吉昔夏啓莖徙九鼎啓

果徙之

昔舜莖登天爲神牧占有黃龍神曰不吉

武王伐殷而牧占著老著老曰吉桀莖伐唐而牧  
占熒惑曰不吉

昔鮫莖注洪水而牧占大明曰不吉有初無後

有鳥如鳥文首白喙赤足曰精衛故精衛常取西  
山之木石以填東海

右詹山帝女化爲詹草其葉鬱茂其華黃實如豆  
服者媚於人

胡粉白石灰等以水和之塗鬢鬚不白塗訖著油  
單裹令溫煖候欲燥未燥間洗之湯則不得著晚  
則多折用煖湯洗訖澤塗之欲染當熟洗鬢鬚有  
膩不著藥臨染時亦當拭鬢燥溫之

子利國人一手一足拳反曲  
張騫使西域還乃得胡桃種

江陵有猛人能化爲虎俗又曰虎化爲人好著紫  
葛衣足無踵

泰山一曰天孫言爲天帝孫也主召人魂魄東方  
萬物始成知人生命之長短

洞庭君山帝之二女居之曰湘夫人又荊州圖語  
曰湘君所遊故曰君山也有道與吳包山潛通上  
有美酒數斗得飲者不死漢武帝齋七日遣男女  
數十人至君山得酒欲飲之東方朔曰臣識此酒  
請視之因一飲致盡帝欲殺之朔乃曰殺朔若死  
此爲不驗以其有驗殺亦不死乃赦之

庭州灞水以含金銀鐵器盛之皆漏唯瓠菜則不



漏

太原晉陽以北生屏風草

海上有草焉名篩其實食之如大麥七月稔熟名  
曰自然穀或曰禹餘糧篩音師

博物志卷第六

博物志卷第七

神農經曰藥物有大毒不可入口鼻耳目者即殺

人一曰鈎吻盧氏曰廢地黃精不相連根苗獨生者是也二曰鷓鴣狀如雌雞生中山三

曰陰命赤色著木懸其子山海中四曰內童狀如鵝赤生海中五日鳩羽如雀黑頭赤豕亦曰螭蝮

生海中雄曰鳩雌曰螭蝮也

神農經曰藥種有五物一曰狼毒占斯解之二曰

巴豆藿汁解之三曰黎蘆湯解之四曰天雄烏頭

大豆解之五曰班茅戎鹽解之毒采害小兒乳汁

解先食飲二升

黃帝問天老曰天地所生豈有食之令人不死者

乎天老曰太陽之草名曰黃精餌而食之可以長

生太陰之草名曰鈎吻不可食入口立死

人信鈎吻之殺人不信黃精之益壽不亦惑乎周

用曰草既殺人仍無益壽者也  
若殺人無驗則益壽不可信矣

神農經曰上藥養命謂五石之練形六芝之延年  
也中藥養性謂合歡蠲忿萱草忘憂也下藥治病  
謂大黃除實當歸止痛夫命之所以延性之所以  
利痛之所以止當其藥應以痛也違其藥失其應  
卽怨天尤人設鬼神矣

孔子家語曰食水者乃耐寒而善浮食土者無心  
不息食水者多而不治食石者肥澤而不老食草  
者善走而愚食桑者有緒而蛾食肉者勇而悍食  
氣者神明而壽食穀者智慧而夭不食者不死而  
神仙者傳曰雖食者百病妖邪之所鍾焉

所食逾少心開逾益所食逾多心逾塞年逾損焉  
魏武帝好養性法亦解方藥招引四方之術士如

左元放華佗之徒无不畢至

周日用曰曹雖好奇而心道異如何招引

方術之人乎如囚左元放而兼見殺若非變化已至滅身故有道者不合親之矣既要試術即可乎

文帝典論曰陳思王曹植辯道論云世有吾王悉招至之甘陵有甘始盧江有左慈陽城有邾儉始能行氣儉善辟穀悉號三百歲人自王與太子及余之兄弟咸以爲調笑不全信之然嘗試邾儉穀百日猶與寢處行步起居自若也夫人不食七日則死而儉乃敢如是左慈修房中之術善可以終命然非有至情莫能行也甘始老而少容自請術士咸其歸之王使邾孟節主領諸人

又一說皇甫隆遇青牛道士姓封名君達其餘養性法即可放用大略云體欲嘗少勞無過虛食去肥濃節酸鹹減思慮損喜怒除馳逐慎房室施寫

秋冬閉藏詳別篇武帝行之有效

又云王仲統云甘始左元放東郭延年行容成御婦人法並爲丞相所錄問行其術亦得其驗降就道士劉景受雲母九子丸方年三百歲莫知所在武帝恆御此藥亦云有驗劉德治淮南王獄得枕中鴻寶苑祕書及子向咸共奇之信黃白之術可成謂神仙之道可致卒亦無驗乃以罹罪也

周曰

神仙之道學之匪一朝一夕而可得黃白者也仍須有分昇騰者應須有骨安可偶然而得法也

劉根不覺饑渴或謂能忍盈虛王仲都當盛夏之月十爐火炙之不熱當嚴冬之時裸之而不寒桓山君以爲性耐寒暑桓山以無仙道好奇者爲之前者已述焉

近魏明帝時河東有焦生者裸而不衣處火不焦

入水不凍杜恕爲太守親所呼見皆有實事

周曰

焦孝然邇河居一菴大雪菴倒人以爲死而視之蒸氣於雪略無變色時或析薪惠人而已故魏書

云自羲皇已來一人而已

潁川陳元方韓元長時之通才者所以並信有仙

者其父時所傳聞河南密縣有成公其人出行不

知所至復來還語其家云我得仙因與家人辭訣

而去其步漸高良久乃沒而不見至今密縣傳其

仙去二君以信有仙蓋由此也

周日用曰豈惟二子乎

左元放荒年法擇大豆麤細調勻必生熟按之令

有光煥氣徹豆心內先不食一日以冷水頓服訖

其魚肉菜果不得復經口渴即飲水慎不可煖飲

初小困十數日後體力壯健不復思食

大鮫法服三升爲劑亦當隨入先食多少增損之

盛豐欲還者煮葵子及脂蘇服肉羹漸漸飲之須  
豆下乃可食豆未盡而以食實物腸塞則殺人矣

此未試或可以然

周日用日又一法臙塗黏餅炙餅令熱即塗之以意量多少即

食之如常渴即飲冷水忌熱茶耳

魏王所集方士名

上黨王真

隴西封君達

甘陵甘始

魯女生

譙國華佗字元化

東郭

延年

唐雱

冷壽光

河南卜式

張貂

薊

子訓

汝南費長房

鮮奴辜

魏國軍吏河南

趙聖師

陽城郟儉字孟節

廬江左慈字元放

右十六人魏文帝東阿王仲長統所說皆能斷

穀不食分形隱沒出入不由門戶左慈能變形幻

人視聽厭刻鬼魅皆此類也周禮所謂怪民王制

稱挾左道者也

又典論云議郎李覃學邾儉辟穀服茯苓飲水中  
不寒洩痢殆至殞命軍祭酒弘農董分學甘始鴟  
視狼顧呼吸吐納爲之過差氣閉不通良久乃蘇  
寺人嚴峻就左慈學補導之術闔豎真無事於斯  
而逐聲若此

魏文帝所記諸物相似亂者 武夫怪石似美玉

蛇牀亂靡無 薺芘亂人參 杜衡亂細辛

雌黃似石留黃 鱖魚相亂以有大小相異 敵

休亂門冬 百步似門冬 房葵似狼毒 鉤吻

堇與苕華相似 拔楔與卑解相似一名狗脊

菊有二種苗花如一唯味小異苦者不中食 野

葛食之殺人家葛種之三年不收後旅生亦不可

食



神仙傳云松柏脂入地千年化爲茯苓茯苓化爲琥珀琥珀一名江珠今泰山出茯苓而無琥珀益州永昌出琥珀而無茯苓或云燒蜂巢所作未詳此二說

神農本草云雞卵可作琥珀其法取伏卵段黃白渾雜者煮及尙軟隨意刻作物以苦酒漬數宿既堅內著粉中佳者乃亂真矣此世所恆用作無不成者

積艾草三年後燒津液下流成鉛錫已試有驗燒鉛錫成胡粉猶類也 燒丹朱成水銀則不類

物同類異用者 烏頭天雄附子一物春秋冬夏採各異也 遠志苗曰小草根曰遠志 芎藭苗

曰江蘿根曰芎藭

地黃藍首斷心分根菜種皆生女蘿寄生兔絲兔  
絲寄生木上生根不著地

博物志卷第七

一、

二、

三、

四、

五、

博物志卷第八

黃帝登仙其臣左徹者削木象黃帝帥諸侯以朝之七年不還左徹乃立顓頊左徹亦仙去也

子路與子貢過鄭神社社樹有鳥神牽率子路子貢說之乃止

處士東鬼塊責禹亂天下事禹退作三章強者攻弱者守敵戰城郭蓋禹始也

澹臺子羽子溺水死欲葬之滅明曰此命也與螻蟻何親與魚鼈何讎遂不使葬

元始元年中謁者沛郡史岑上書訟王宏奪董賢璽綬之功靈帝和光元年遼西太守黃翻上言海邊有流屍露冠絳衣體貌完全使翻感夢云我伯夷之弟孤竹君也海水壞吾棺槨求見掩藏民有

襁褓視皆無疾而亡

豫章郡衣冠人有數婦暴面予道尋道爭分銖以給其夫與馬衣資及舉孝廉更敢富者一切皆給先者雖有數年之勤婦子滿堂室猶放黜以避後人

代城始築立板幹一旦亡西南四五十板於澤中自立結草爲外門因就營築焉故其城直周三十七里爲九門故城處爲東城

漢滕公薨求葬東都門外公卿送喪駟馬不行踣地悲鳴跑蹄下地得石有銘曰佳城鬱鬱三千年見白日吁嗟滕公居此室遂葬焉

衛靈公葬得石槨銘曰不逢箕子靈公奪我里

漢西都時南宮寢殿內有醇儒王史威長死葬銘

曰明明哲士知存知亡崇隴原豐非寧非康不封  
不樹作靈乘光厥銘何伊王史威長  
列傳云聶政刺韓相白虹爲之貫日  
要離刺慶忌彗星襲月

專諸刺吳王僚鷹擊殿上

子胥伐楚燔其府庫破其九龍之鍾

武王伐紂至盟津渡河大風波武王操戈秉麾麾  
之風波立霽

魯陽公與韓戰酣而日暮援戈麾之日反三舍

太公爲灌壇令武王夢婦人當道夜哭問之曰吾

是東海神女嫁於西海神童今灌壇令當道廢我

行我行必有大風雨而太公有德吾不敢以暴風

雨過是毀君德武王明日召太公三日三夜果有

疾風暴雨從太公邑外過

晉文公出大蛇當道如拱文公反修德使吏守蛇  
吏夢天殺蛇曰何故當聖君道覺而視蛇則自死  
也

齊景公伐宋過泰山夢二人怒公謂太山之神晏  
子謂宋祖湯與伊尹也爲言其狀湯皙容多髮伊  
尹黑而短卽所夢也景公進軍不聽軍鼓毀公怒  
散軍伐宋

澹臺子羽渡河濟千金之璧于河河伯欲之至陽  
侯波起兩鮫挾船子羽左操璧右操劍擊鮫皆死  
旣渡三投璧于河河伯躍而歸之子羽毀而去  
荆軻字次非渡鮫夾船次非不奏斷其頭而風波  
靜除

周日用曰余嘗行經荆將軍墓墓與羊角哀  
冢鄰昔安伯旄左爲荆將軍所伐乃在此

也其地在苑陵之源求見其墓碑將軍名乃作次飛字也

東阿王勇士有蕃丘訢過神淵使飲馬馬沈訢朝服拔劍二日一夜殺二蛟一龍而出雷隨擊之七日夜眇其左目

楚熊渠子夜行射窮石以爲伏虎不爲沒羽

徐偃王志云徐君宮人娠而生卵以爲不祥棄之水濱獨孤母有犬名鵠蒼獵於水濱得所棄卵噉以來歸獨孤母以爲異覆煖之遂蛸成兒生時正偃故以爲名徐君宮中聞之乃更錄取長而仁智襲君徐國後鵠倉臨死生角而九尾實黃龍也偃王又葬之徐界中今見狗襲偃王旣其國仁義著聞欲舟行上國乃通溝陳蔡之間得朱弓朱矢以己得天瑞遂因名爲弓自稱徐偃王江淮諸侯皆



伏從伏從者三十六國周王聞遣使乘駟一日至楚使伐之偃王仁不忍聞言其民爲楚所敗逃走彭城武原縣東山下百姓隨之者以萬數後遂名其山爲徐山山上立石室有神靈民人祈禱今皆見存

京兆都張潛客居遼東還後爲駙馬都尉關內侯表言故爲諸生太學時聞故太尉常山張顥爲梁相天新雨後有鳥如山鵲飛翔近地市人擲之稍下墮地民爭取之卽爲一圓石言縣府顥令搥破之得一金印文曰忠孝侯印顥表上之藏於官庫後議郎汝南樊行夷校書東觀表上言堯舜之時舊有此官今天降印宜可復置

孝武建元四年天雨粟孝元景寧元年南陽郡都

兩穀小者如黍粟而青黑而味苦大者如大豆赤黃味如麥下三日生根菜狀如大豆初生時也

大司馬曹休所統中郎謝璋部曲義兵奚儂息女年四歲病歿故埋葬五日復生太和三年詔令休使父母同時送女來視其年四月三日病死四月埋藏至八日同墟入採桑聞兒生活今能飲酒如常

結胸國有滅蒙鳥奇肱民善爲扞扛以殺百禽能爲飛車從風遠行湯時西風至吹其車至豫州揚破其車不以視民十年東風至乃復作車遣返其國去玉門關四萬里

比翼鳥一青一赤在參嵎山

羽民國民有翼飛不遠多鸞鳥民食其卵去九疑

四萬三千里

驩兜國其民盡似仙人帝堯司徒驩兜民常捕海島中人面鳥口去南國萬六千里盡似仙人也

厭光國民光出口中形盡似猿猴黑色

三苗國昔唐堯以天下讓於虞三苗之民非之帝殺有苗之民叛浮入南海爲三苗國

穿胸國昔禹平天下禽諸侯會稽之野防風氏後到殺之夏德之盛二龍降之禹使范成光御之行域外旣周而還至南海經房風房風之神二臣以塗山之戮見禹便怒而射之迅風雷二龍昇去二臣恐以刃自貫其心而死禹哀之乃拔其刃療以不死之草是爲穿胸民

交趾足交在穿胸東

孟舒國民人首鳥身其先主爲嚳氏訓百禽夏后  
之世始食卵孟舒去之鳳皇隨焉

止些山多竹長千仞鳳食其實去九疑萬八千里  
員丘山上有不死樹食之乃壽有赤泉飲之不老  
多大蛇爲人害不得居也

蒙雙民昔高陽氏有同產而爲夫婦帝放之此野  
相抱而死神鳥以不死草覆之七年男女皆活同  
頸二頭四手是蒙雙民

太人國其人孕三十六年生白頭其兒則長大能  
乘雲而不能走蓋龍類去會稽四萬六千里

風山之首方高三百里風穴如電突深三十里春  
風自此而出也

君子國人衣冠帶劍使兩虎民衣野絲好禮讓不

爭土千里多薰華之草民多疾風氣故人不蕃息  
好讓故爲君子國

堇花朝生夕死

箕子居朝鮮其後伐燕之朝鮮亡入海爲鮮國師  
兩妻黑色珥雨青蛇操兩蛇蓋勾芒也

神宮在高石沼中有神人多麒麟其芝神草有英  
泉飲之服三百歲乃覺不死去琅邪四萬五千里  
嘔絲之野女子乃跪據樹嘔絲在三桑西也

博物志卷第八

博物志卷第九

臨邛火井一所從廣五尺深二三丈有在縣南百里昔時人以竹木投以取火諸葛丞相往視之後火轉盛執盆蓋井上煮鹽得鹽入以家火卽滅訖今不復燃也

酒泉延壽縣南山名火泉火出如炬

徐公曰西域使王暢說石流黃出疋彌山去高昌八百里有石流黃數十丈從廣五六十畝有取流黃晝視孔中上狀如煙而高數尺夜視皆如燈光明高尺餘暢所視見入也言時氣不知皆往保此山

魏文帝黃初三年武都西都尉王褒獻石膽三十斤四年獻三斤

九守有神牛乃生谿上黑出時共鬪卽海沸黃或出鬪岸上家牛皆怖人或遮則霹靂號曰神牛日南有野女羣行見丈夫狀晶自裸袒無衣褻昔日南貢四象各有雌雄其一雄死於九真乃至南海百有餘日其雌塗土著身不飲食空草長史問其所以聞之輒流涕矣

南方有落頭以其頭能飛其種人常有所祭祀號曰虫落故因取之焉以其飛因服便去以耳爲翼將曉還復著體吳時往往得此人也

東海中有牛體魚其形狀如牛剝其皮懸之潮水至則毛起潮去則毛伏

南海有鱗魚狀似鼉斬其頭而乾之去齒而更生如此者三乃止

屠龜解其肌肉唯腸連其頭而經日不死猶能齧物鳥往食之則爲所得漁者或以張鳥神蛇復續無啓民居穴食土無男女死埋之其心不朽百年還化爲人細民其肝不朽百年而化爲人皆穴居處三國同類也

南海外有鮫人水居如魚不廢織績其眼能泣珠蜀山南高山上有物如獼猴長七尺能人行健走名曰猴獮一名化或曰猓獮同行道婦女有好者輒盜之以去人不得知行者或每遇其旁皆以長繩相引然故不免此得男女氣自死故取男也取去爲室家其生子者終身不得還十年之後形皆類之意亦迷惑不復思歸有子者輒俱送還其家產子皆如人有不食養者其母輒死故無敢不養



也及長與人不異皆以楊爲姓故今蜀中西界多  
謂楊率率皆猥獲化之子孫時時相有獲爪者也  
越地深山有鳥如鳩青色名曰冶鳥穿大樹作巢  
如升器其戶口徑數寸周飾以土堊白相次狀如  
射侯伐木見此樹卽避之去或夜冥人不見鳥鳥  
亦知人不見己也鳴曰咄咄去明日便宜息上樹  
去咄咄下去明日便宜急下若使去但言笑而不  
已者可止伐也若有穢要及犯其止者則虎通夕  
來守人不知者卽害人此鳥白日見其形鳥也夜  
聽其鳴人也時觀樂便作人悲喜形長三尺澗中  
取石蟹就人火間炙之不可犯也越人謂此鳥爲  
越祝之祖

交州夷名曰俚子俚子弓長數尺箭長餘以焦銅

爲鏹塗毒藥於鏹鋒中人卽死不時斂藏卽降脹  
沸爛須臾焦煎都盡唯骨耳其俗誓不以此藥法  
語人治之飲婦人月水及糞汁時有差者唯射猪  
犬者無佗以其食糞故也焦銅者故燒器其長老  
唯別焦銅聲以物杵之徐聽其聲得焦毒者偏鑿  
取以爲箭鏹

蝮蛇秋月毒盛無所蜚螫嚙草木以泄其氣草木  
卽死人樵採設爲草木所傷刺者亦殺人毒治於  
蝮齧謂之蛇迹也

江南諸山郡中大樹斷倒者經春夏生菌謂之椹  
食之有味而忽毒殺人云此物往往自有毒者或  
云虵所著之楓樹生者啖之令人笑不得止治之  
飲土漿多愈

人以冷冰水自漬至脛可頓啖數十枚瓜漬至腰  
啖轉多至頸可啖百餘枚所漬水皆作瓜氣味此  
事未試人中酒不解治之以湯自漬卽愈湯亦作  
酒氣味也

平原管輅善卜筮解鳥語

漢中興士人皆冠葛巾建安中魏武帝造白帟於  
是遂廢唯二學書生猶著也

博物志卷第九

博物志卷第十

著末大於本爲卜吉次蒿次荆皆如是

龜著皆月望浴之五

夏桀之時爲長夜宮於深谷之中男女雜處十旬不出聽政天乃大風揚沙一夕填此空谷

又曰石室瑤臺關龍逢諫桀言曰吾之有民如天之有日日亡我則亡以爲龍逢妖言而殺之其後山復於谷下反在上耆老相與諫桀又以爲妖言而殺之

夏桀之時費昌之河上見二日在東者爛爛將起在西者沉沉將滅若疾雷之聲昌問於馮夷曰何者爲殷何者爲夏馮夷曰西夏東殷於是費昌徙族歸殷

昔彼高陽是生伯鯨布土取帝之息壤以填洪水

昔西夏仁而去兵城郭不修武士無位唐伐之西  
夏云昔者玄都賢鬼神道廢人事其謀臣不用龜  
策是從忠臣無祿神巫用國

猩猩若黃狗人面能言

犬戎文馬赤鬣身白目黃金名古黃之乘復薊之  
露犬也能飛食虎豹

榆州氏之君孤而無使曲沃進伐之以亡

昔有巢氏有臣而貴任之專國主斷斷已而奪之  
臣怒而生變有巢以亡

昔者清陽強力貴美女不治國而亡

昔在洛氏宮室無常囿池廣大人民困匱商伐之  
有洛以亡

太妣夢見商之庭產棘乃小子發取周庭梓樹樹

之子闕聞梓化爲松柏棫柞覺驚以告文王文王  
曰慎勿言冬日之陽夏日之餘不召而萬物自來  
天道尙左日月西移地道尙右水潦東流天不享  
於殷自發之未生於今十年禹羊在牧水潦東流  
天下飛鴻滿野日之出地無移照乎

帝之二女堯之二女也丘乎曰南湘夫人二女啼  
以涕揮竹竹盡斑

華山有蛇名肥遺六足四翼見則天下大旱

崇丘山有鳥一足一翼一目相得而飛名曰虬見  
則吉良乘之壽千歲

夷海內西北有軒轅國在窮山之際其不壽者八  
百歲

渚沃之野鸞自舞民食鳳卵飲甘露

白民國有乘黃狀如狐背上有角乘之壽三千歲  
海水西夸父與日相逐走渴飲水河謂不足北飲  
大澤未至渴而死棄其策杖化爲鄧林  
嘔絲之野有女子方跪據樹嘔絲北海外也

三珠樹生赤水之上

遠方諸山蜜臘處以木爲器開小孔以蜜臘塗器  
內外令遍春月蜂將生育時捕取三兩頭著器中  
蜂飛去尋將伴來經日漸益遂停器中

魏武伐蹋頓經白狼山逢師子使格之見一物從  
竹中出如狸上帝車輓上師子將至便跳師子頭  
師子伏不敢起遂殺之得師子還至四十里雞犬  
皆無鳴吠

東海有牛魚其形如牛引其皮懸之潮水至則毛

起潮退則毛伏

王忝張衡馬均昔冒重霧行一人無恙一人病一人死問其故無恙人曰我飲酒病者食死者空腹赤刀周之寶器也

博物志卷第十





後跋

去歲謀刻是書命兒子玉堂依影宋鈔者錄一帙  
與粵東賈人往古藥洲開彫洎成寄歸復命之用  
原書纖悉校正因檢予鄉所刻汲古閣祕本書目  
中有北宋版博物志一本估價四兩云其次序與  
南宋版不同係蜀本大字真奇物也影鈔當出於  
此自是一重公案予前序略而不及謂宜作後序  
表出之碌碌未果也今年修版方畢而玉堂遽病  
病二十許日以二月七日死矣子夏號咷漢碑千  
載同痛擬屬我友顧君千里爲撰小傳并搜其篋  
中一二讀殘之書倘係祕笈卽付剞劂用希附驥  
乃憶及前事輒跋是書之尾從此印行有日而玉  
堂竟不逮見也可悲也夫時嘉慶九年三月不烈